

## James

James-el pip nhenh tanthek, nakenh-nakenh map-warn-anem lanthek, inarl ngkwey mer Judea-eng anam-irrek mer arrpenh map-warn.

*Angketj nhenhan wenh-arteheh anem pip nhenhel-ayeng?*

Artwang nyent arreny James rang angketj nhenh arrernek pip-warn. Rang Jesu-kenh tjey apek anek, arrpenh apek. Nwern iterlaretj-kwenh-antey anem. Jesu-kenh tjey James rang nyent-areny anetjart. Jesu rang irrenngeng iteth-irrekarl-penh, Angey kwerenhwarn alpekarl-penh, James nhenh rang nakenhnakenhemeh irrek. Kwer-penh James werlamparenyek arntarnt-arenh-arenh anek *town* Jerusalem-el. Jew arrpenh map mer arrpenhek-arrpenh-areny nakenh-nakenh irrekemeh. Rang apek pip nhenh lanthek ineh-warn.

James-el rang inenh kaltj-anthek pip nhenhel-ayeng: “Ntwang nakenh-nakenh apek anem, ntwang arratj mernelhetjeh, arrpenh mapel aretjeh. Ntwang apek maney-kweny anem, itja angerr iterretjeh. Arrpenhel apek rnpwer mpwarem ngkweng, ngwenh nakepaket-illem apek, kwenk anay, itja Angey impetjeh. Parrp ahangirretjal anetjeh. Mwerr mpwarang arrpenh mapek. Arrpenh mapek tjel-angketjal anetjeh. Angey pawenhay, ngwenh kaltj-anthetjeh, arratj iterretjeh Angey-warn-athetjeh. Ntjwem-irray arrentj angerr-kenh tjey-ketj. Nakelhetj-kweny

anetjeh. Angeyant tjang-pawenay arrpenh mapek." Lakenh James-el kaltj-anthek.

<sup>1</sup> Yeng James anem, yeng Altjerrek Ngkart Jesu Christ-ek thwen rrkwapenh-apen anem. Thang pip nhenh lanthem arrehantherr-warn, arrantherr nakenh-nakenh anemarl-warn, arrantherr irrarnp-irrekarl mer arrpenh map-warn. Arrantherr ngkwey Judea-eng petjek, lyet arrantherr alethang anem mer arrpenhek-arrpenhel. Thang angketj mwerr nhenh arrehantherr-warn lanthem.

*Arrentjel-arlk arrantherrenh arrtjelh-ilemeng apek, arranther arrken war anetjeh*

<sup>2</sup> Peltj mapay, arrentjel arrantherrenh arrkernemel arrtjelh-ilemeng apek, alherrentj anetjel apek; tjerrtjel-arlk apek arrantherrenh nakepakel-ilemeng, arranther irlkert apek irremeng, arranther rwekenth-kenth apek anemeng, arranther mernek iltjelay-irremeng apek, arranther-artek arrkenant anetjeh.

<sup>3-4</sup> Wenheng? Imampwerl-rlwer Altjerrel arrantherrenh kaltj-anthem, kwenk kwet anetjeh, arranther Altjerr renh twerel kwet naketjenheng. Lakenh Altjerrel nakentj arrehantherr-henh twer-ilem.

<sup>5</sup> Wenheham Altjerr rang ahentj-anem, arranther mwerr mernelhetjeh? Nakenh-nakenh ngwenh apek palekalek-irremeng, inang kel Altjerr pawenhetjeh, rang inenh kel kaltj-anthemel arratj-iletjeh. Altjerr rang itja arnkely-irretjeh, rang kangkentj wart anemeng.

<sup>6</sup> Tjerrtjel apek Altjerr renh pawenhemeng, rang

renh nakentj-akertel pawenhetjeh. Rang itja lakenh iterretjeh, "Thang war renh pawenhetjeh." <sup>7-8</sup> Tjerrtj inarl kern war pawenhemeng, inartek iterrentj atherr-akert anem, palekalek wart. Inang itja twerel Altjerr nakem. Altjerr rang ineh itja kangkwerretjeh.

*Tjerrtj rnwanentj angerr-akert mapek  
nthakenh irretjehn*

<sup>9</sup> Tjerrtj nakenh-nakenh ngwenh apek anemarl maney-kweny apek, mern-kweny apek, rnwanentj-kweny apek, inang arrken anetjeh, inang Altjerr-henh peltj wart anemeng. Inang arrken anetjeh, Altjerr rang ineh ltarrp-irremel inenh kwet arntarnt-aretjehn. <sup>10</sup> Kenh peltj nakenh-nakenh inang maney rnwanentj-arlk angerr-akert anem, inang arrken anetjeh, Altjerr-rel wart inenh apek kwen-iletjehn. Tjerrtj maney angerr-akert map inang kel anteth-arteħ ywer-renhetjehn. <sup>11</sup> Aherrk arratemeng, aretharr rang altwerleng angkemeng, anteth inang antjerrk-irremel ahelh-warn anyem. Inang itja weth anteth-akert anem. Lakenh-arteħ anetjehn tjerrtj maney angerr-akerteh. Inehenh rrk-wapentj ywerretjehn. Inang itja kwet maney-arlk rnwanentj-arlk inehenh antwerrketjehn.

*Arrpenhel apek arrantherrenh arrtjelh-ilemeng,*

*anetj mpwaretjeh, arranther kwenp kwet anetjeh*

<sup>12</sup> Arrentjel apek tjerrtj arrpenhel-arlk apek tjerrtj inenh arrtjelh-ilemarleng, anetj mpwaretjeh. Tjerrtj inarl itja ineh kangkwerremeng, inang Altjerr kwerant kangkwerremeng, Altjerr

ineh kangkem. Altjerrel inenh alhelem, rang inenh kwart-wem, iteth ngampekarl anthetjeh. Tjerrtj ngwenh apek inarl Altjerr kwer nyerrkemeng, rang inenh lakenh kwart-wetjeh.

<sup>13</sup> Tjerrtj arrpenhel tjerrtj ngwenh apek arrtjelh-ilemarleng, anetj mpwaretjeh, tjerrtj nheng arrtjelh-ilekarl-penh rang itja rrtjwerremel ilelhetjeh, “Altjerrel kwel yengen twernekarl, thang anetj mpwaretjeh.” Altjerr rang itja tjerrtj lakenh arrtjelh-ilem, anetj mpwaretjeh. Tjerrtjel kwenh Altjerr renh itja arrtjelh-ilem, anetj mpwaretjeh. <sup>14-15</sup> Tjerrtj inarrp-artek alherrentj anetj inehenheh kangkwierrem. Tjerrtj alherrentj anetj inehenheh kangkwierremarleng, inang kel anetj mpwarem. Inang kel anetj kwet mernelhemeng, inang apek itja twep-irremeng, anetj inehen mangkem. Kelant lwerenh-akert inang ilwetjeh.

<sup>16</sup> Tjerrtj mapay, tjerrtj arrpenhel apek arrantherrenh rrtjwerremel ilem lakenh, “Altjerrel kwenh yengen arrtjelh-ilem, thang anetj mpwaretjeh!” Arrantherr kwer itja kangkwierretjeh.

<sup>17</sup> Angey alker-arenyel kwenh wenh-wenh ingkerrek nwerneh anthem. Lakenh kwenh mwerr anthwerr anem. Parrtj alker-areny rang arrmernekarl, nwern anem parrtj kwerenhel kwet. Anyentj-arlk inang ingkerrek angartwelhem, kenh Angey alker-areny rang angartwelhetj-kwenyarl anem. Rang irrikatj kwet anem. <sup>18</sup> Angey rang ahentj-anek wart, kel nwerneh ngakemel ngwek, tjerrtj kwerenhanetjeh. Nheng kwer kwekeng-ntjel mangkem-arte, lakenh-arte rang nwernen mangkelh-ilem

angketj kwerenhel-arleng. Lakenh nwern kw-erenh nakenh-nakenh arrwekeleny map anem, tjeperr kwer.

*Arrantherr itja mentjel Altjerr-henh angketj awerl-anetjeh. Arrantherr kangkwerretjeh angketj kwerenhek kwet*

<sup>19</sup> Peltj nyerrkentj tjengenh mapay, arrantherr-artek angketj atjernpel awetjeh-amparr, angketj arratj apek anemeng, pal apek anehetjeng. Arrantherr iterretjeh-amparr. Pal-pal angketjal anay, angketj mwerr arratjant angketjeh, atjernp angketjeh. Ahang-irretj-kweny anetjeh. <sup>20</sup> Tjerrtj ngwenh apek rarl parrp ahang-irrem, rang itja arratj mernelhem Altjerreng ularr. <sup>21</sup> Arrantherr anetj impetjeh, anetjeh iterretjal anerrerrang. Mwerrehant athek-irretjeh. Arrantherr Altjerr-henh angketjehant irlpareth kangkwerretjeh. Altjerrel kel angketj nhenh iterrentj arrehantherr-henh-warn kwernek. Angketj nhenhel-ayeng Altjerrel arrantherrenh arntarnt-arem anetjeng.

<sup>22</sup> Arrantherr Altjerr-henh angketjeh kangkwerretjeh. Arrantherr angketj itja war awerl-anetjeh. Arrantherr apek angketj renh war awerl-anemeng, arrantherr-artek perrpert-ilelhem war. <sup>23</sup> Tjerrtj ngwenh apek rang Altjerr-henh angketj awerl-anem, rang angketj kwer itja kangkwerrem, kel rang tjerrtj rarteh anetjenh, rang kwenh inngerr kwerenh kwatjel tjwerr-arelhemarl-arteoh. <sup>24</sup> Rang arelhem kwatj kwerel, inngerr kwerenh alhwang-akert apek anem. Rang alhem kwatj kwerel inngerr lhewelhentj-kweny. Rang angwerrem,

inngerr kwerenh lhewelhetjeh. Tjerrtj inang Altjerr-henh angketj war awerl-anem, inang itja angketj kwer kangkwerrem, inang tjerrtjant war anem. <sup>25</sup> Tjerrtj inang Altjerr-henh angketj irlpareth awerl-anem, kweteth kangkwerremel angwerretj-kweny, inenh Altjerrel kwart-wem. Inang angketj nhenheh kangkwerremeng apek, yanh-penhan inang itja weth ahentj-irretjeh, alherrentj anetj inehenh kangkwerretjeh.

<sup>26</sup> Tjerrtj ngwenh apek ilelhem, “Yeng nakenh-nakenh irlpareth anem!” Rang apek tjerrtj arrpenheh lhwerrkert kwet angkem, arrpenh iltem apek, rang war kwewaleny anetj-ilelhem. Tjerrtj nhenh rang anem irlpareth-kweny. <sup>27</sup> Tjerrtj ngwenh apek athek-irrem, Altjerr Angeyeng ularr irlpareth anetjeh, inartek lhampeh inpergeh-arlk tangetjel anetjeh, inenh arntarnt-aremel. Lhamp inpert thwen inarl apek rwekenth-kenth anemarleng. Tjerrtj irlpareth nheng inang itja ahelh-arenyeh angerr athek-irretjeh. Inang alherrentj anetj inehenh impetjehant. Lakenh kwenh anetjeh!

## 2

*Arrantherr apek tjerrtj maney angerr-akerteh kangkem, kenh tjerrtj maney-kwenyeh arrantherr kangkentj-kwenyarl anem. Nhenh itja arratj anem*

<sup>1</sup> Peltj mapay! Arrantherr kwenh Ngkart Jesu Christ renh nakem, rang parrtj angerr-akert anemeng. Arrantherr kwenh itja peltj

arlaltj arrehantherr-henhehant kangketjeh. Arrantherr tjerrtj ingkerrekeh kangkentj kwet mernelhetjeh, tjerrtj mwerreh apek, tjerrtj anetj-anetjeh apek. <sup>2</sup> Lakenh-arteh anem. Arrantherr pipeh arrow-irremel anemeng, artwang maney angerr-akert apek irrpentjemeng, rnwanentj mwerr anthwerr-akert irrpentjemeng. Artwang maney-kwenyemeh irrpetylamarleng mantarr anetj-anetj-akert apek. <sup>3</sup> Arrantherr artwang mantarr amparrkey-akert-warn lakenh angkem, “Keth mwerr nhenhel arrernelhang.” Kenh artwang rnwanentj anetj-anetj-akert-warn arrantherr angkem apek, “Ntwarr alenhel arrernelhay.” Arrantherr apek kwer angkem, “Yanhel ntwang irnang.” <sup>4</sup> Arrantherr apek lakenh angkem, arrantherr pal iterremel mernelhem. Arrantherr iterrem, tjerrtj maney angerr-akertant rang kwel angerr anemeng, kenh tjerrtj maney-kwenyan rang kwekarl. Arrantherr angketj lakenh angkemarleng, arrantherr war anetj-ilelhem.

<sup>5</sup> Peltj mapay, tjerrtj arrpenh mapemeh iterrem, “Altjerrel maney angerr-akert mapant urrarem, inarl renh nakemeng kwel.” Itja inenhant. Altjerrel kwenh tjerrtj maney-kweny rnwanentj-kweny map urrarem, inarl renh nakemeng wart. Rang tjerrtj nhenh inenh alhelem, inang kelant mer kwerenh-warn irrpetylenthal. Mer rarl nheng arrwekel kwet mpwarekarl kwer-warn, tjerrtj kwer nyerrkemarl mapeh. <sup>6</sup> Arrantherr tjerrtj maney-kweny map mentjel arem ahentj-kweny-irremel. Arrantherr kel kaltj, tjerrtj maney angerr-akert inang kwenh

arrantherrenh nakepaket-ilem! Inang anthwerremeh arrehantherr irrpelth-irremel *court-warn angem.* <sup>7</sup> Inangemeh kwenh Ngkart-henh arrency-arlk anetj mpwarem arrampewem-arlk.

<sup>8</sup> Mpwareng-areng nhenh Altjerr-henh pipel-ayeng intem, “Ntwang tjerrtj arrpenheh nyerketjeh, ntwarl ngkzewaleny nyerrkem-arteh.” Lakenh kwenh Altjerr-henh mpwareng-areng tjepperr anem. Arranthererr mpwareng-areng nhenheh kangkwerremel anetjeh, arrantherremeh arratj mernelhetjenh. <sup>9</sup> Arranthererr apek arlaltj arrehantherr-henhehant nyerrkemeng, kenh tjerrtj arrpenheh-arlk ahentj-kwenyirremel mentjel arranthererr arem, arranthererr lakenh mpwareng-areng Altjerr-kengeh itja arratj kangkwerrem, arranthererr tjerrtj arrpenheh itja nyerrkem. Arranthererr kwenh Altjerreng ularr anetj-akert anem, arrantherremeh rrwer-nelhem.

<sup>10</sup> Tjerrtj nyentel apek Altjerr-henh mpwareng-areng rrpwtjehant kangkwerremeng, nyent mentj impemel, rang rrwernelhem. Tjerrtj arrpenhel mpwareng-areng mentjel arem ingkerreny, kangkwerretj-kwenyel, ratherr atherrel-antey rrwernelhem Altjerreng ularr. <sup>11</sup> Altjerr rang nwernenh ilem, “Ntwang itja tjerrtj arrpenh-henh anewel-arleng intetjeh.” Tjerrtj ngwenh apek lakenh ilelhem, “Yeng kel mwerr, yeng itja tjerrtj arrpenh-henh anewel-arleng intek.” Wenheham rang tjerrtj arrpenh irrernng atwek? Altjerrel renh iletjenh, “Ntwang mpwareng-areng nyenteh kangkwerrek, mpwareng-areng arrpenheh

ntwang itja kangkwerrek. Ntwang tjerrtj arrpenh irrernng atwek! Lakenh mpwareng-areng tjengenh ntwang ltwakek! Ntwang rrwernelhem kwet.”

<sup>12</sup> Altjerrel kwenh arrantherrenh pawenhet-jehn, “Arrantherr key Jesu Christ-eh arratj kangkwerrekarl, arrpenh mapeh nyerrkemeng?” Arrantherr “Yew” tjernemel angkemeng, kw-ereng rang arrantherrenh anetj arrehantherr-henheng inetjenheng. Kwereng arrantherr athek-irretjenh, arratj kwet mernelhemel anet-jeh. <sup>13</sup> Tjerrtj ngwenhel apek tjerrtj arrpenh arntarnt-aretj-kweny anek, kelant Altjer-rel lharrp-kwenyel tjerrtj renh atwetjenh. Altjerr ahentj-anem, arrantherr mantj-mantj mernel-hetjeh tjerrtj arrpenheh-arlk, ineh arntarnt-aremel. Arrantherr tjerrtj arrpenhek apek mantj-mantj mernelhemeng, rang arranther-renh itja atwetjenh. Rang arrehantherr mantj-mantj mernelhetjeh.

### *Nakenh-nakenh inang tjerrtj arrpenh mapeh tangetjel anetjeh*

<sup>14</sup> Peltj mapay, tjerrtj ngwenh apek lakenh ilelhem, “Yeng nakenh-nakenh anem.” Rang itja mantj-mantj mernelhekarl tjerrtj arrpenh ineh. Tjerrtj rartek Altjerr renh itja arratj nakek. Lakenheng rang Altjerreng ularr rrwernelhem, Altjerrel renh itja anetj kwerenheng inetjenh.

<sup>15</sup> Yeng ahentj, angketj kwek war arrehan-therr iletjeh. Peltj arrehantherr-henh ngwenh apek mantarr-kweny mern-kweny apek anem.

<sup>16</sup> Ntwang renh ilem, “Mantarr mwerreh irrpang,

mern arlkwetjeh-anngernt!” Ntwang kwer rnwanentj mern itja anthe. Lakenh ntwang war rrtjwerrem! Angketj ngkwengen irlkang-arteh war. Ntwang renh arntarnt-aremer. <sup>17</sup> Lakenh tjerrtj ngwenh apek angkem, “Thang Altjerr renh nakemarl wart”, kenh rang itja Altjerreh kangkwerrem, rang itja arratjel Altjerr renh nakem. Tjerrtj rang war rrtjwerrem. Rang war nakentjkweny tjwenelhem.

<sup>18</sup> Thang tjerrtj renh ilem, “Ntwang Altjerr renh nakemarleng, kel mwerr. Thang renh nakem, yeng mpwareng-areng kwerenhek kangkwerremarlam. Yeng nakentj tjengen lakennh mernelhem. Ntwang Altjerr renh naketjeh, kwer kangkwerretjeh. Tjerrtj ngwenhel apek Altjerr renh arratj nakem, inang kel Altjerreh kangkwerrem.” <sup>19</sup> Tjerrtj ngwenh apek lakennh ilelhem, “Thang iterl-arem Altjerr nyentant war.” Thang renh tjernem, “Arratj kwenh lakenh! Kenh arrentjel-arlk kwenh iterl-arem Altjerr renh, rang nyent anemeng. Inang kwenh arewemel kwereng ularr ater-irrem. Inang Altjerr renh iterl-arem, inang kenh itja kwer kangkwerrem.”

<sup>20</sup> Tjerrtj nheng rarl ilelhem, rang Altjerr renh nakemarl war kwel, thang tjerrtj renh ilem, “Ntwang pal iterrem! Ntwang itja arratj nakem, ntwang war perrpert-ilelhem!” Thang ngwenh mernetjenhemeh, tjerrtj rarl iterreperremarl, rang kwel Altjerr renh nakem, rang itja Altjerreh kangkwerrem, rartek itja arratj iterrem. <sup>21</sup> Ntwam arrwekeleny Abraham nheng iterlarem? Wenheng Altjerrel Abraham renh ilek,

“Ntwang arratj anem tjengeng ularr.”? Rang ler kwerenh Isaac renh ker itenhan-itenhel-ayel arrernek, renh atwetjeh-anngernt. Tjenkerr Altjerreh anthetjeh-anngernt. Lakenh kwereng Altjerr kwer nyerrkemel angkek. <sup>22</sup> Arrantherr angketj nhenheh irlpangkemel alhengk-aretjeh, Abraham rang kwenh Altjerreh nakenh-nakenh anek. Rang ler kwerenh tjenkerr anthetjeh anek Altjerreh, rang kwenh Altjerreh lakenh kangkwerrek. Ratherr pwert anem, renh naketjeh, kwer kangkwerretjeh-arlk. Abraham rang lakenh mernelhek, nakentj kwerenh arratj anek. <sup>23</sup> Lakenh Altjerr-henh angketj pipel-ayeng intem, “Abraham-el Altjerr renh nakek. Altjerrel renh ilek, ‘Thang ngwenh alhengk-arem, ntwang artwang arratj anem.’” Angketj nhenh thang arrantherrenh irlpangkelh-ilem. Arrwekelel map inang kaltj anek, Abraham rang Altjerr-henh peltj wart anetjart. <sup>24</sup> Nthakenhameh nwern mernelhetjeh, Altjerr rang nwerneh ahang-irretjkweny anetjeh? Nwern renh itja naketjehant. Nwern kwer angerr kangkwerretjeh nakemel. Angketj ratherr-artek nyent kwet anem. Lakenh nwern arratj anetjeh Abraham-arte, Abraham-henh ingkelarr alhetjeh.

<sup>25</sup> Arrantherr marl arrwekelel iterl-arem arreny Rahab key? Rang arrwekel marl arlk-wer anek. Kenh artwang ratherrarl mer renh aretjeh alherrekarleng, Rahab rang nheng renh-atherrenh ngwek, kwerel-ayeng anetjeh. Marlel renh-atherrenh arntarnt-arek. Kwer-penh rang renh-atherrenh angkep lanthekarl. Lakenh marl rang mpwarekarleng, Altjerreng ularr rang

arratj mernelhekarl. <sup>26</sup> Tjerrtj ngwenh apek ilelhem, “Thang Altjerr renh nakem”, rang kenh itja Altjerreh kangkwerrem, rang irrernng-arteh anem, nakentj-kweny.

## 3

### *Angketj aleny-akert*

<sup>1</sup> Peltj mapay, arrantherr itja athek-irretjeh, kaltj-anthenh-anthenh anetjeh. Inang Altjerr-henh angketj kaltj-anthem, tjeperr anthwerr. Arrantherr iterretjeh-amparr. Iterl-aray, kelant Altjerrel kaltj-anthenh-anthenh map angerr *judge-em-iletjenh*, kenh tjerrtj arrpenh map kern war *judge-em-iletjenh*. Lakenh-hetj. <sup>2</sup> Nwern ingkerrek arrpenh-ingar anetj mpwarem. Tjerrtj ngwenh apek arratj kwet angkem, inartek arratj anthwerr anem, inartek aleny mpwerrk thwen arratj anyenem.

<sup>3</sup> Iterl-arang, artwang ngwenh apek kaltj nan-thek, rang nantheh antjem, rang *reins-el turn-em-ilemeng*, nanth rang kel kwer kangkwerrem. Rang nanth renh *reins-el turn-em-ilem* ingerr apek alhetjeh, nanth rang kel ingerr alhem. Altwerl apek, rang kel altwerl alhem. *Iron* kwek arreny *bit*, rartek nanth renh *turn-em-ilerl-apem*. *Bit* rang kwek anthwerr arrakertel anem! <sup>4</sup> *Boat* iterl-arang. *Boat* rang kwenh angerretj anthwerr anem. Renh irlkang twerel war aleth alhetjeh pew-ilem. *Boat*-ek-artwey rang *boat* renh *turn-em-ilerl-apem* *steering wheel-el*. *Steering wheel-warn* arnang petjem, arnang arrpenh kwekeng petjem, arreny

*rudder.* *Rudder* rang ingkern-ampeny kwen anthwerr anem kwatjel-ayeng. *Rudder* rang kwenh *boat* angerretj *turn-em-ilerl-apem*. *Rudder* rang kwek anthwerr anem! <sup>5</sup> Tjerrtj-henh alenyemeh iterl-arang! Aleny kwenh kwek war anem. Kwerel tjerrtj angerr anthwerr tjwenel-hemel nakelhem. Nhenh iterl-arang. Rwang alngenth kwekel kwenh rwang angerr anthwerr anthelem. <sup>6</sup> Aleny rang kel lakenh-arteh anem. Arrakert kwenel rang kwek anem. Kwerel tjerrtj angketj anetj angerr anthwerr angkem. Aleny rang tjerrtj-henh mpwerrk kwerrern-arlk anetj-ilem. Tjerrtj rang rwekenth-kenth kweteth anem. Arrentj rarrp kwenh aleny renh anetj angketjeh twernem.

<sup>7</sup> Nwenth wenh-wenheh apek iterrang, thepeh-arlk k watj kwen-arenyeh-arlk. Tjerrtjel kel inenh kangkwerretjeh kaltj-anthem. <sup>8</sup> Nwern aleny nwern-henh arratj kwet anyenem key? Nwern key itja anetj angketjeh? Itja kwet, nwern anetj kwet angkem aleny nwern-henhel-ayeng! Amwangel tjerrtj nhwem-artek, arrwengkelth amwa-kenh tjerrtjek irrpem, tjerrtj irlkert-ilem, lakenh-artek kwenh anem, nwern anetj angkem tjerrtj arrpenheh.

<sup>9-10</sup> Aleny nyent kwereng angketj mwerr angketj anetj thwen arratem. Aleny nwern-henhel nwern Ngkart Angey renh nakem. Aleny nyent kwerel nwern tjerrtj arrpenh iltem, arrampewem-arlk apek. Tjerrtj renh Altjerrelarl rarteh arrmernekarl. Peltj mapay, nwern itja lakenh angketjeh. <sup>11-12</sup> Kwatj *well-areny iterl-arang*. *Well* nyentel anyenem k watj mwerr,

antjwenh-antjwenh. *Well* arrpenhel anyenem k watj ilewerr apek, itja antjwetjeh. Kwatj mwerr kwatj ilewerr thwen itja *well* nyenteng arratem, itja kwenh. Peltj mapay, arnang tjwerrk mangkemeng, alangkw tjwerrk thwen ratherr itja pwert mangkem. Mern tjwerrkant mangkem! Lakenh-arreh aleny nwern-henhel-ayeng nwern itja anetj angketjeh! Angketj mwarrant angketjeh!

### *Iterrentj alker-areny*

<sup>13</sup> Arrantherr iterl-arem, arrantherr iterrentj mwerr-akert apek anemeng. Kwereng arrantherr arratj mernelhang, mwerr rrkwapetjeh tjerrtj arrpenh mapek, tjwenelhetjal anetjeh. <sup>14</sup> Arrantherr apek tjerrtj arrpenheh ahentj-kweny anemeng, arrantherr ngkwewalenyan nyerkelhemeng, arrantherr itja nakelhetjeh, arrantherr iterrentj mwerr-akert kwel anemarleng. Arrantherr itja rrtjwerremel ilelhetjeh. <sup>15</sup> Tjerrtj inang tjerrtj arrpenheh ahentj-kweny anemeng, Altjerrel inenh itja kwenh lakenheh kaltj-anthek. Arrentj rant kwenh lakenh kaltj-anthem. <sup>16</sup> Arrantherr apek tjerrtj arrpenheh ahentj-kweny anemeng, ngkwewalenyan nyerkelhemeng, arrantherr ingkerrek rrwernelhem lakenh angkemarlan.

<sup>17</sup> Altjerrel arrantherrenh kaltj-anthem, iterrentj alker-areny-akert anetjeh. Lakenh arrantherr Altjerreng ularr arratj anthwerr mernelhetjenh. Arrantherr nyerrkentj, mantj-mantj mernelhetjenh. Arrantherr tjerrtj ingkerrekeh arratj kwet mernelhetjeh, tjerrtj mwerreh apek,

anetj-anetjeh apek. <sup>18</sup> Tjerrtj inarl iterrentj alker-areny-akert anem, inang kel arratj mernelhem. Inang tjerrtj ahangerr map twepelh-ilem, inang arratj ngwerleny anetjeheng.

## 4

*Altjerrehant kangkwerray. Itja alherrentj anetj arrehantherr-henheh kangkwerretjeh*

<sup>1</sup> Wenheng arrantherr atwerremel ilterrem-arlk? Thang arrantherrenh ilem. Alherrentj anetj kwerrern mwerr thwen mpwerrk arrehantherrel-ayeng ratherr atwerremeng wart. Ratherr nyentam-nyentel arrehantherrel-ayeng kwenel atwerremeng. Lakenh arrantherr alherrentj anetjehant war kangkwerrem. <sup>2</sup> Arrantherr rnwanentjeh-arlk alherremel ahentj-anem, arnang arrpenh-henh-arlkeh. Arrantherr tjerrtj arrpenh mapeh ankey nkem, rnwanentj inehenheh ahentj-anemel. Lakenhengemeh arrantherr ahang-irremel atwerrem. Arrantherr tjerrtj arlaltj irrernng atwem. Arrantherr Altjerr pawenhetj-kweny, lakenhengemeh arrantherr rnwanentj-kweny anem. <sup>3</sup> Arrantherr-artek maneyek apek war Altjerr pawenhek arrken-irretjeh-anngernt. Lakenheng Altjerrel arrantherrenh mentj awem.

<sup>4</sup> Arrantherr-artek Altjerreng ntjwem kwet anem, arrantherr renh itja nakem. Arrantherr kaltjarlam, tjerrtj inarl ahelh nhenh-arenyeh rnwanentjeh-arlk angerr alherremel nyerkem, inang itja Altjerr-henh peltj anem. Tjerrtj ngwenh apek inang Altjerreh ahentj-kweny mapeh

kangkwerrem, inangemeh itja Altjerr-henh peltj anem. Lakenheng arrantherr ahelh nhenh-arenyeh rnwanentjeh-arlk angerr alherremel nyerrkem, Altjerr kel arrehantherr ahel anem.

<sup>5</sup> Angketj Altjerr-henh pipel-arleng intem, “Kwerrern Altjerrel tjerrtjeh arrwekel anthekarl, kwerrern nhenh rartek kwteth wenh-wenh mer ahelh-arenyek alherrem.” Altjerr ahentj-anem, kwerrern nwern-henh kwerant kangkwerretjeh.

<sup>6</sup> Altjerreleme nwernenh twer-ilem, nwern nyerkentj mernelhetjeh. Angketj arrpenh Altjerr-henh pipel-ayeng intem,

“Tjerrtj ngwenh apek Altjerreng ularr nakelhem, renh Altjerrel anpwetjenh.

Tjerrtj ngwenh apek itja tjwenelhem, kwer Altjerr rang nyerkentj mernelhet-jenh.” \*

<sup>7</sup> Lakenheng arrantherr itja Altjerreng ularr tjwenelhetjeh. Arrantherr kwerant war kangkwerretjeh. Arrantherr arrentj-ketj twer irn-errerrang, kwereng arrentj rang arrehantherreng ater alhetjenh. <sup>8</sup> Altjerr kwet nakerrerrang. Kwereng rang arrehantherr-warnemeh angkepantey angath-irrem. Tjerrtj anetj mapay, anetj yanheng alngelhetjeh, mwerr arrantherr iteth-iteth irretjeh! Altjerrehant kangkwerretjeh! Iterrentj tjey nyentant anetjeh. <sup>9</sup> Arrantherr lharrpel arnelh-ilerremel anetjeh. Arrantherr atherretjkweny anetjeh, intert anetjeh. Arrantherr itja arrken anetjeh. <sup>10</sup> Arrantherr itja Altjerreng ularr tjwenelhetjeh, kwereng rang arrantherrenh alhengk-aremel ngkernetjenh.

---

\* <sup>4:6</sup> Proverbs 3.34

### *Arrantherr tjel-angketj-kweny anetjeh*

<sup>11</sup> Peltj mapay! Arrantherr tjel-angketj-kweny anetjeh. Lakenh angkemel arrantherr Altjerr-henh angketjeh irrpelth-irrem. Arrantherr Altjerr kwer irrpelth-irrem, arrantherr itja angketj kwerenheh kangkwerrem. <sup>12</sup> Altjerrel kwenh angketj kwerenh ngkernek, arltang nyentel tjer-rtj nwernenh *judge-em-ilemel* pawenhetjenh. Altjerrelant tjerrtj iteth rrkwem, Altjerrelant tjer-rtj irrernng atwem apek. Nhenhan Altjerr-henhant mpwareng-areng anem, tjerrtj-kweny. Lakenheng arrantherr itja peltj arrpenheh tjel-angketjeh.

### *Arrantherr Altjerr-amparr arrwekel ngker-nang*

<sup>13</sup> Arrantherr apek lakenh angkem, iterrentj ngkewewalenyal mpwarem Altjerr pawenhetj-kwenyarl, “Lyet apek ngwenth apek yeng kel *town* ntwarz alenh-warn alhetjenh, kwereng yeng mer kwerelemeh kwet anetjeh. Thang rnwanentj wenh-wenh angemel *sell-em-iletjenh*, lakenh maney angerr mpwaretjenheng.” Yenge-meh awerrerrang! Artwang nhenhel-artek itja Altjerr renh pawenhek, nthakenh rang mpwaretjeh. Rang iterrentj arlaltj kwerenh-akertant angkek. <sup>14</sup> Ngwenth arrantherr nthakenh irretjenh? Arrantherr kaltj anetj-kweny, wenh-arteuh arrehantherr anetjeh. Arrantherr rwang kwert-arteuh anem. Kwert renh irlkel angem, arrantherr lakenh-arteuh ywerretjenh. <sup>15</sup> Arrantherr lakenh angketjeh, “Ngkart rang tjeng apek nyerkem, yeng kwerel-ayeng iteth

kwet anetjenh, ngwenth thang lakenh mpwaret-jenh.” <sup>16</sup> Arrantherr tjwenelhemel nakelhem, arrantherr Altjerreng ularr rrwernelhem. Lakenh anetj anem. <sup>17</sup> Arrantherr alhengk-arem arratj mpwaretjeh, arratj anetjeh, arrantherr ywarn awetj-kweny, angketj yanh mentj impem, yanh-an anetj, arrantherr rrwernelhem Altjerreng ularr.

## 5

*James-el ateng-ilem tjerrtj ngwenh apek  
anem maney arwenth-akert*

<sup>1</sup> Maney arwenth-akert mapay, thang arrantherrenhant war ilem, arrantherr angketj nenh awetjeh. Arrantherr arnetjehant. Arrantherr ngwenth war rwekenth-kenth angerr-warn irrpetyl-jenh. <sup>2</sup> Lakenh arrehantherr anetjenh. Interrkel rnwanentj arrehantherr-henh arlkwetjeheng, altjwer-altjwer-ilemel. <sup>3</sup> Ngkweltj *gold silver*-arlk rnwanentj-arlk arrantherr wakekarl-penh arlkeny ywerretjenh. Ngkweltj ineheng arrngel Altjerrel arrantherrenh pawenhetjenh *judgement*-ehan ingkern. <sup>4</sup> Artwang rrkwapen-hrrkwapen-h map *farm* arrehantherr-henhel rrkwapekarl-penh, mern anngang kwetjemel, arrantherremeh ineh maney-arlk anthentj-kweny-antey. Rrkwapen-hapen-h inang arrantherrenh ywarn pawenhek inarl rrkwapekarl-penh, inang ywarn iterrek. Inang arnemel angkek Ngkart-warn. Ngkartel ineh awek. Rang twer angerr-akert

anem. <sup>5</sup> Maney angerr-akert mapay, arrantherr kwenh ahelh nhenhel warl mwerr anthwerrel anek, rnwanentj angerr-akert. Arrantherr intjarlkwenh-intjarlkwern lakenhan. Arrantherr ker angerr atwemel arlkwetjart, mernarlk. Lwerenh-penh arrantherr lakenheng tjerrtj anter angerr-akert irrek. Kelant Altjerrel arrantherrenh atwetjenh, *station*-arenyel pwelek anter angerr-akert atwemarl-arteh. <sup>6</sup> Arrantherr tjerrtj peltj ngkwantj-irremel irrernng atwekarleng wart. Inang arrehantherr peltj anek!

*Arrantherr kwenp alkwernetjeh,  
Ngkart rang petj-alpetjeh-atwetj*

<sup>7</sup> Peltj mapay, arrantherr kwenp alkwernewar-rang, Ngkart rang petj-alpetjeh-atwetj. Arrantherr artwang ineh iterrang, inarl mern anngang ahelh-warn kwen kwernem. Inang inenh kwernekarl-penh, inang alkwernem, kwatj alker-penhel-amparr anhetjeh. Kwatj-penh mern anngang lyapemel angerremeh irrem. Anteth arratem, kwer-penh mern ngwenm-irrem. Mpank arletj-rlwer, inang kwenp-amparr alkwernewem. Twernel ampemarl-rlwer, mern inang ampeng-irrem. Artwang inang mern aketjehemeh alhem.

<sup>8</sup> Arrantherr ineh-arteh kwenp kwet alkwer-netjeh, arratj iterremel anetjeh. Itja alngarel-hetjeh. Ngkart rang kwenh ngwenth war petj-alpetjeh. <sup>9</sup> Peltj mapay, arrantherr itja lhwer-kert angketjeh tjerrtj arrpenh mapeh. Arrantherr apek lhwer-kert angkem, Altjerrel arrantherrenh atwetjenh. Altjerr rang ngwenth war tjerrtj map nyentam-nyent pawenhemel

*judge-em-iletjenh, nthakenh inang iteth-rlwer mernelhekarl-penh.*

<sup>10</sup> Peltj mapay, arranthererr iterl-arem key, Altjerr-henh angketj angenh-angenh arrwekeleeny map, inang Altjerr-henh angketj ilet-jart? Tjerrtj arrpenh mapel inenh nakepakel-iletjart. Inang kwenpel kwet tjerrtj inenh kaltj-anthetjart. Arrpenh mapel arrantherrenh nakepakel-ilemeng apek, arranthererr twer an-errerrang, arrwekeleny ineh-arteh. <sup>11</sup> Nwern tjerrtj inenh alhengk-aretjeh, inarl kwenp Altjerreh akarelhetjart rwekenth-kenth-rlwer. Aywang nheng Job-ek iterrewarrang. Job kwer rwekenth-kenth angerr anek, Altjerr-warn rang kwenp angketjart. Arranthererr kaltj, rang rnwanentj kwerenhan parlp-ilek warl-arlker pwelek-arlker mern-arlker arlaltj kwerenhan map-arlker ingkerreny rang parlp-ilek. Mer kwerenhan ingkerreny arrentjel ulpert mpwarek. Kwer-penh arrentjel Job renhemeh tjwen apapeth mpwarek. Job rang kwenpel kwet Altjerr renh nakek, rang itja Altjerr kwer arnkely-irrek. Rwekenth-kenth-penh Altjerr kwer ltarrp-irremel angkwerr-wek. Ngkart kwenh nyerrkentj anthwerr anem, rang nwerneh lakenh-arteh mantj-mantj mernelhem.

<sup>12</sup> Peltj mapay, thang arrantherrenh angketj twerel ilem, arranthererr mantj-irretjeh. Arranthererr itja tjerrtj arrpenheh lakenh alheletjeh, “Altjerrel yeng arem, thang ngkweng awakem!” Ngkweltj, rnwanentj apek. Itja lakenh rrtjwerremel alheletjeh. Arratjant war angketjeh, Altjerrel arrantherrenh atwehetjeng. Tjerrtjel apek arrantherrenh pawenhemeng, arranthererr

tjernemel “Yaw” apek angketjeh, “Itja” apek. Lakenhant war angketjeh.

*Tjerrtj ngwenhel apek nakentj-akertel Altjerr  
renh pawenhem, inenhant Altjerrel awetjenh*

<sup>13</sup> Ntwang apek rwekenth-kenth awelhem, parrk apek, irlkert apek, Altjerr renh pawenhang. Ntwang apek arrken anem, alyelhemel Altjerr nakang. <sup>14</sup> Ntwang apek irlkert awelhem, urrpey werlampareny-warn angketj lanthang, angerrepatt arntarnt-arenh-arenh rrpwetj ngwetjeh. Inenh ilang, Altjerr ngkweng pawenhetjeh, olive anterel ngwenh pernetjeh, Ngkart-henh arreny anewemel. Lakenh. <sup>15</sup> Tjerrtj nakentj-akertel Altjerr renh pawenhem tjerrtj arrpenheh-anngernt, Altjerrel kel renh awetjenh. Altjerrel tjerrtj irlkert renh mwerr-iletjenh. Tjerrtj nhenhel apek arrwekel anetj mpwarekarl, Altjerrel anetj kweren wem.

<sup>16</sup> Arrantherremeh ngkewaleny anetj arrehantherr-henh ularrek-ularrel ilelhetjeh. Arranther Altjerr renh pawenhetjeh, rang wart arrantherrenh mwerr-iletjenh.

Lakenh intem: tjerrtj ngwenh apek rang arratj mernelhemel Altjerreng ularr anentjekarl, rang lhwerrkert angketj-kweny, rang anetj mpwaretj-kweny, rang arratj irlpareth anthwerr anem, rang awenh-awenh, rang nyerrkemel mernelhem arrpenh mapeh, artwang nhenhel Altjerr renh tjang-pawenhem arrpenheh apek, Altjerr rang kwenh kwer kangkwerrem. <sup>17</sup> Altjerr-henh

angketj angenh-angenh nheng Elijah alhengk-arewarrang. Elijah rang nwerneh-arteh anek, tjerrtj ahelh-areny. Rang twerel kwet Altjerr pawenhek, kwatj ywerrelh-iletjeh. Altjerrrel renh awekarl-penh, kwatj-kweny anek *year rrpwetjek-atwetj* wart. <sup>18</sup> Kwereng rang Altjerr renh pawenhek, angkep kwatjel anhetjeh. Kwatjelemeh anhek, mern atherrkemeh lyapek mer Israel ntjaperel. Lakenh Altjerr rang tjerrtj arratjeh kangkwerrem.

<sup>19-20</sup> Peltj mapay! Tjerrtj naked-nakedh ngwenhel apek Altjerr-henh angketj impekarl, angketj arratj awetj-kwenyemeh, perrpertemeh anemarleng, renh twepelh-ilang, rang Altjerrwarn angkep twep-irretjeh. Mwerr kwenh lakenhan. Rang ngkweng kangkwerremeng, ntwang renh Altjerr-warn twepelh-ilek. Altjerrel renh peltj-ilemel anetj kwerenh kel taly-wetjenh. Altjerr rang renh mantj-mantj-ilemel rrkwetjenh, rang kwerel-ayeng iteth kwet anetjenh.

**Anmatyerr Bible  
Portions of the Holy Bible in the Anmatyerr  
language of Australia**

copyright © 2015 Wycliffe Bible Translators

Language: Anmatyerr (Anmatyerre)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-12-10

---

PDF generated using Haiola and XeLaTeX on 11 Nov 2022 from source files dated 31 Jul 2020

c7b5f903-6339-5827-b974-60b3bf575b31